

Newspaper	BERITA HARIAN
Date	5 AUGUST 2016

# Malaysia, Ukraine komited cari kebenaran

BH  
- 5/8/2016

**Oleh Irwan Shafrizan Ismail  
dan Zanariah Abd Mutalib**  
bhnews@bh.com.my

Putrajaya

**M**alaysia dan Ukraine terus komited mengetahui kebenaran di sebalik tragedi pesawat Malaysia Airlines MH17 ditembak jatuh di Donetsk, timur Ukraine, dua tahun lalu.

Perdana Menteri, Datuk Seri Najib Razak, berkata negara yang terbabit kini menunggu laporan siasatan jenayah mengenai nahas itu, yang dijangka dibentangkan menjelang hujung tahun ini.

"Selepas laporan jenayah ini diterbitkan, lima negara (anggota Pasukan Penyiasat Bersama (JIT) iaitu Malaysia, Australia, Belgium, Belanda dan Ukraine) akan bertemu kembali bagi memutuskan tindakan seterusnya, bentuk dan cara bagi memastikan keadilan ditegakkan dan dilaksanakan terhadap pesalah yang menembak jatuh pesawat penumpang itu.

"Kita komited untuk melakukan apa sahaja yang termampu teru-

tama demi keluarga yang kehilangan orang tersayang dalam insiden tragik itu," katanya pada sidang media bersama Presiden Ukraine, Petro Poroshenko, di Perdana Putra di sini, semalam.

### Selesai secepat mungkin

Sementara itu, Poroshenko mengulangi pendirian sama dan mahu siasatan berhubung nahas itu diselesaikan secepat mungkin.

"Saya merakamkan simpati kepada keluarga mangsa nahas yang menderita akibat serangan keganasan terhadap MH17," katanya.

Pesawat MH17 yang dalam perjalanan dari Amsterdam, Belanda ke Kuala Lumpur ditembak jatuh di ruang udara Donetsk, timur Ukraine pada 17 Julai 2014, mengorbankan 283 penumpang dan 15 anak kapal termasuk 44 warga Malaysia.

Sementara itu, Malaysia dan Ukraine setuju menubuhkan Suruhanjaya Perdagangan Bersama bagi membuka lebih banyak peluang syarikat Malaysia mengambil bahagian dalam dasar penswastan negara itu.

Perkara itu dipersetujui dalam

pertemuan bersama Najib dan Poroshenko, selain suruhanjaya terbabit ditubuhkan secepat mungkin.

Dalam pertemuan empat mata itu, Najib berkata, mereka turut membincangkan mengenai pendidikan dan prospek menambah bilangan pelajar Malaysia ke Ukraine.

"Kami turut bersetuju memulakan perbincangan mengenai visa semasa ketibaan (VOA), bagi memudahkan kunjungan pelancong Malaysia ke Ukraine dan sebaliknya, malah selepas lawatan Presiden ini saya harap lebih ramai rakyat Ukraine memilih Malaysia sebagai destinasi pelancongan," katanya.

Di **Kuala Lumpur**, isteri Presiden Ukraine, Maryna Poroshenko melawat Pusat Permata Kurnia di Jalan Sentul Perdana, semalam. Kehadirannya disambut Pengerusi Jawatankuasa Permata, Datuk Seri Dr Azizah Abod dan Penasihat Permata di Jabatan Perdana Menteri, Tan Sri Dr Sharofah Hapsah Syed Hassan Shahabuddin.

→ Ukraine yakin Malaysia jadi rakan dagang ketiga terbesar - **Bisnes Ms.B3**

→ Pasukan Penyiasat tentukan tindakan selepas selesai siasatan